

□ البيه المأمور □

راجع مصر المغربية بياخد معاه شروة سمك حلوة وعلبة سجائر  
عشرين وخمسة جنيه يشترك فيها المشايخ الاثنى الغلابة دول .

— مفيش حد م السجن بيفتش ؟

— ويفتش ليه يا عم ، المدير يهमे ما يحصلش دوشة والنتيجة  
تكون مية فى المية وخلص !

الأستاذ حمد الله المرتشى والذى صدر ضده الحكم بثلاث  
سنوات سجن ، كان شديد الثورة على الفساد الذى ينهش فى جسم  
مصر ، ذات صباح ونحن جلوس على الدكة نمص القصب كالعادة ،  
قال بحماس شديد :

— مش المدرسة بتاع السجن بس الى ماشية كده ، يا أستاذ  
دى البلد كلها ، المهم النتيجة الرسمية الى هتعرض على المدير  
بيص فيها وينشكح لاحد بيشغل ولا حد بيتعلم ، والمهم النتيجة  
مية فى المية .

وصمت الأستاذ حمد الله وانهمك فى مص القصب بعض الوقت  
ثم نظر نحوى نظرة طويلة قبل أن يقول : يعنى أنا عملت إيه ؟  
خدت ألف جنيه من المحل ده وخمسميت جنيه من الدكان ده ،  
وفيه إيه دى ؟ بدمتك دى رشوة ؟ دى حسنة . الدور والباقي على  
الى بياخدوه الوحوش الثانية بتوع المصلحة وبتوع الوزارة ، لكن  
تقول إيه بقى ، ما يجوش إلاع الغلابة الى زينا .

عاد الأستاذ حمد الله إلى مص القصب ، وسرح بعيدا عن المكان  
والزمان ، ثم عاد منها إلى جلستنا وقال لى بحماس :

— المهم أنت عملت كام ؟

— عملت كام فى إيه ؟

— يعنى هبرت هبرة نضيفة ؟

— اهبر منين ؟